




# Mudiad Addysg Gristnogol Cymru Christian Education Movement Wales

Tymor yr Haf 2002

Pris £1.00

## Syniadau A.G.

### Defnyddio Arteffactau Crefyddol yn y Dosbarth



Bu disgyblion Blwyddyn 3 yn astudio sgrôl y Torah a'r Yad. Fe'u hanogwyd i edrych yn ofalus ar y symbolau ar orchudd (mantell) y sgrôl. Gwnaed sgorliâu gan rai o'r disgyblion, hefyd ysgrifennu a darlunio storïau a phenillion. Gwnaed mentyll hefyd ac fe'u harddangoswyd yn y dosbarth.




Bydd y rhifyn yma o 'Syniadau Addysg Grefyddol' yn edrych sut y defnyddiwyd arteffactau i ddysgu am Iddewiaeth, Islam a Christnogaeth yn Ysgol Gynradd Dunvant, Abertawe.

Mae defnyddio arteffactau crefyddol yn ffordd o fywiogi y broses o ddysgu, a gall ddyfnhau dealltwriaeth o gymuned grefyddol, ei chredoau, dysgeidiaeth ac ymarferion. Dylid trin arteffactau gyda pharch a gofal, a dylid annog plant i ddefnyddio eu synhwyrâu pan yn astudio arteffactau.

Ceir yma syniadau sut i wneud bocsys o arteffactau ar gyfer y 3 crefydd. Fe gymer amser i gasglu banc o arteffactau - foddbynnag mae nifer o safleoedd ar y We sydd yn rhoi gwybodaeth am gredoau ac arferion crefyddol ar gyfer y rhai nad ydynt yn arbenigwyr, a cheir nifer o luniau da, lliwgar o arteffactau; gellir lamineiddio yr rhain a'u defnyddio i ddysgu. Mae cyfeiriadau y We ar ddiwedd y rhifyn yma.


## Arddangos Arteffactau



Paratowyd y bwrdd Shabbat yma gan grwp o ddisgyblion blwyddyn 5 - 'r oeddynt yn dysgu am Iddewiaeth.

'Roedd arddangosfa o arteffactau yn delio a chrefydd arbennig neu a thema arbennig yn llyfrgell yr ysgol - felly gallai'r athrawon a'r disgyblion fynd yno i edrych ac i gyffwrdd yr arteffactau. Annogir y plant i feddwl am gwestiynau i'w gofyn am yr arteffactau ac arddangosir y cwestiynau hefyd.

Newidir yr arddangosfa bob hanner tymor.




Astudio a gwneud y Meswsa - BI 5

### Myfyrdod

Gellir defnyddio arteffactau a cherddoriaeth fel canolbwynt i feddwl a myfyrdod, yn yr ystafell ddosbarth neu yn y gwasanaeth boreol. Gellir cael bwrdd yn arddangos cwestiynau a darluniau fel ffocws yn y dosbarth.

### Goleuni

Gellir defnyddio arddangosfa syml o ganhwyllau fel adnodd wrth astudio Crisnogaeth neu Wyliau y Goleuni. Gallai'r arddangosfa gynnwys canhwyll y Pasg, canhwyll Fedydd, Cylch Adfent, Diva, Menora, a Chanukah. Rhowch olau ar y gannwyll ac eglurwch i'r plant fod llawer o bobl yn credu fod y mwg o'r gannwyll yn cario eu gweddiau at Dduw. Pa neges hoffent ei anfon? Dysgwch am y goleuni tragwyddol.



### Astudio y Meswsa

Ystyr 'Shaddai' yw 'hollalluog'  
Pam fod y gair yma yn cael ei  
Ysgrifennu ar gefn y Meswsa ?

Mae'r gair Meswsa yn cynnwys  
Sgrôl gyda geiriau o'r Torah arno.  
Gwnewch eich Meswsa a'ch sgrôl  
eich hun. Pa eiriau fyddwch yn eu  
defnyddio a pham ?

## Archwilio ac Ymchwilio i Arteffactau

### Archwilio Arteffactau

Archwiliwch yr arteffact yn ofalus:

1. Disgrifiwch yr arteffact. Pa siap yw?  
Lliw? Graen? Pa ddefnydd yw? Pa faint?  
Ydi o yn drwm neu yn ysgafn?

2. I beth mae'n cael ei ddefnyddio?

3. Pa grefydd mae'n perthyn iddi? Pam?

4. Tynnwch lun yr arteffact a'i liwio.



### Mat Gweddi y Mwslim

Pa ddefnydd yw'r mat?  
Pa addurniadau welwch chi?  
Pa addurniadau na welwch chi byth mohonyn  
nhw ar fat gweddi a pham?  
Pam fod cwrpawd ar y mat gweddi?  
Beth yw enw y lle y mae'r Mwslemiaid yn ei  
wynebu wrth weddio?  
Dyluniwch a gwnewch eich mat gweddi eich hun.



### Stand y Qur'an

I ba beth y defnyddir y stand?  
Ydi'r cynllun yn bwysig?  
Sut mae'r stand wedi ei addurno?  
Pa fath o batrymau sydd yn y cerfiadau?  
Tynnwch lun a dyluniwch stand.  
Dychmygwch eich bod chi yn stand i'r Qur'an.  
Disgrifiwch sut rydych yn teimlo pan fyddwch  
yn cael eich defnyddio. Ble rydych chi? Pwy  
sydd yn cyffwrdd a chi a pham? Beth welwch  
chi, beth aroglwch chi, beth glywch chi?  
pa fath o raen ydych yn ei deimlo?

### Y Shofar (Corn Hwrdd)

Pwy sydd yn defnyddio y corn?  
Pryd a sut mae'n cael ei ddefnyddio?  
O ba ddefnydd y gwnaed y corn?  
Ceisiwch ddisgrifio siap a graen y corn.  
Chwiliwch am wybodaeth am wyliau Rosh  
Hashanah a Yom Kippur (Dydd y Cymod).  
Sut maent yn dathlu yr rhain?

